

E mords Idee

Omm vorsche Somsdaach habb isch beim Graulich dess Kättche getroffe unn habbse gefroochd: Ei gude, Kättche, was mächsden du hier, wollerr baue?

Ei gude aach, seets Kättche, ja, mir baue aus, unn weil de Schorsch su beschäffdischd iss, hodder mich geschickt, e paar Neeschel unn e Dutt voll Schrauwe ze holle.

No ja, saach isch, e paar Neeschel unn e Dutt voll Schrauwe, doo werdd de Bau nitt su arsch gruß soi. Was bader donn aus, de Schorsch?

De Schorsch, seets Kättche, der baut unser Voochelheisje aus.

Isch habb gelacht. Der werdd gewiss dem Heisje noch e Bad oibaue, dass die Veeschel sich nitt nor vollfresse kenne, sie kenne sich noochher aach gleich noch bade. Awwer doo longe die Neeschel unn die Schrauwe, die de jetzt geholld host, awwer nitt, doo brauchdsde noch e Badbidd.

Dess Kättche druff: Schleeschdschwätzer. Awwer de Schorsch dut joo nitt alloons ausbaue, unsern jingsde Enkel dut emm helfe unn der hott aach die Zeichnung ferr den Ausbau gemacht. Waaßde, Honnes, die jung Kerle mett ihrne neimodische Händys, die su gruß sinn wie e Friehtiggsbrettche, mett dene mache die joo Sache, dess konnsde derr garnitt vorstelle.

Isch habb mich omm Kobb gekratzt unn gefroochd: Awwer was hott donn doim Enkel soi Smartfon, su haaße die Dinger, meddem Voochelheisje ze due? Solle die Veeschel jetz beim Futtern doo druff babbele?

Honnes, seets Kättche, der Bub hotts mir erklärt unn isch duns dir aach erklärn. Weil jedes Mol wonn der Bub bei uns kumme iss, hodder dem Schorsch soi Fernglas genumme unn hott dene Veeschel, die onns Heisje kumme sinn, zugeguggd, unn hott aach nooch dem Schorsch soine Voochelbischer immer genau wisse wolle, was ferr Veeschel dess grad sinn. Unn uff oomol iss dem Bub e Idee kumme, unn nooch dere Idee wird des Heise jetz ausgebaut. De erst emol werdds greeßer gemacht unn donn werdd middedroi enn gons kloone Fotoabberat oigebaud, der iss nitt greeßer als enn ... enn ... no ja, enn Golfballe.

Dess iss gut, saach isch, unn der Abberat, der mächt donn Bilder, unn nooch dene Bilder kann merr genau seh, was fernn Voochel omm Heisje war. Doo muss merr bei besonnere Veeschel nor noch im Voochelbuch bläddern.

Dess, seets Kättche, habb isch aach gemoond, awwer naa, der Bub mächt dess su, dass die Veeschel direkt uff soi Händy, soi Smartfon, kumme unn, jetz bass owacht, jetzt kimmt dess, was der Bub sich ausgedenkt hott. Weil der aach alle Veeschel, dies bei uns su gewwe dut, aus dene Voochelbischer in dess Smartfon genumme hott, brauch der garnimmi gruß im Buch ze bläddern, naa, dess werdd gleich uff dem Bildscherrm gezeischd, de Voochel omm Heisje unn wie der haaße dut unn wonn der Nesder baut unn alles Meeschliche. Er hoddse unns schunn emol gezeischd, die Kohlmeise, die Spatze, enn Kleiber, also Omsel, Drossel, Fink unn Star, iss dess nitt doll, was der Bub doo gemachd hott?

Isch habb dem Kättche die Hond gedriggd unn gesaad: Kättche, doin Enkel isse Schenie, dess isse mords Idee von emm, der muss die Sach unbedingt de rischdische Leit oobiede, weil wasse doo gemachd hott dess dut merr e App nenne unn dess werdd dem Bub gons gewiss ferr vill Geld abkaafd.

Moonsde?, frächts Kättche, dess muss isch dene zwaa gleich verzähle.

Erzählst emm Schorsch, saach isch, der Bub waaß des schunn sellwer. Awwer jetz mach dich ab, doi Neeschel unn Schrauwe wernn gebrauchd.

Awwer, hotts Kättche noch gesaad, doi Idee medde Badbidd, die iss aach nitt schlecht, villeischd baut de Schorsch die joo aus emm ahle Blechdeller noch onns Heisje droo. Also machs gut, unn fort warse.

Eiern Honnes